



AN COIMISIÚN
EORPACH

An Bhruiséil, 18.8.2020
COM(2020) 384 final

2020/0179 (COD)

Togra le haghaidh

CINNEADH Ó PHARLAIMINT NA hEORPA AGUS ÓN gCOMHAIRLE

**Lena leasaítear Cinneadh Uimh. 445/2014/AE lena mbunaítear gníomhaíocht Aontais do
Phríomhchathracha Cultúir na hEorpa do na blianta 2020 go 2033**

(Téacs atá ábhartha maidir le LEE)

MEABHRÁN MÍNIÚCHÁIN

1. COMHTHÉACS AN TOGRA

Is le Cinneadh Uimh. 445/2014/AE a rialaítear gníomhaíocht “Príomhchathracha Cultúir na hEorpa” (PCE)¹ le haghaidh theidil na mblianta 2020 go 2033. San Iarscríbhinn a ghabhann leis an gCinneadh, tá liosta cróineolaíoch ina léirítear an bhliain nuair a bheidh gach Ballstát (dhá cheann in aghaidh na bliana) nó tír is iarrthóir/iarrthóir ionchasach a ghlacann páirt i gClár Eoraip na Cruthaitheachta, nó i gcláir de chuid an Aontais ina dhiaidh sin lena dtacaítear leis an gcultúr, i dteideal an ghníomhaíocht a óstáil. Cuirtear tús leis na comórtais le haghaidh theideal PCE sé bliana roimh bhliain an teidil nuair a fhoilsíonn an t-údarás ábhartha an glao ar iarratais.

Le Cinneadh (AE) 2017/1545², leathnaíodh an ghníomhaíocht chuig cathracha as tíortha i gComhlachas Saorthrádála na hEorpa atá ina bpáirtithe sa Chomhaontú ar an Limistéar Eorpach Eacnamaíoch agus a ghlacann páirt i gClár Eoraip na Cruthaitheachta, nó i gcláir de chuid an Aontais ina dhiaidh sin lena dtacaítear leis an gcultúr. Dá réir sin, cuireadh an féilire a bhí i gceangal le Cinneadh (AE) 2017/1545 in ionad an fhéilire a bhí i gceangal le Cinneadh (AE) 445/2014/AE.

Déantar cur síos ar chuspóirí ginearálta agus sonracha ghníomhaíocht PCE in Airteagal 2 de Chinneadh Uimh. 445/2014/AE. Seo iad: éagsúlacht cultúr san Eoraip a choimiriciú agus a chur chun cinn, an cultúr a spreagadh go dtacóidh sé le forbairt fhadtéarmach na gcathracha, an tairiscint chultúrtha sna cathracha a fheabhsú ó thaobh réimse, éagsúlacht agus gné Eorpaí de, lena n-áirítear trí chomhar idirnáisiúnta, rochtain ar chultúr agus rannpháirtíocht ann a leathnú, acmhainneacht na hearnála cultúrtha agus a naisc le hearnálacha eile a neartú, próifíl idirnáisiúnta na gcathracha a ardú trí chultúr.

Baineann na cuspóirí sin le soghluaisteacht, taisteal, eagrúchán imeachtaí agus rannpháirtíocht an phobail, agus tá bac mór ar na cuspóirí sin a bhaint amach de dheasca phaindéim COVID-19 a bhfuil iarmhairtí tromchúiseacha léi maidir le PCE reatha agus PCE atá beartaithe a ullmhú agus a chur ar siúl.

Ní bhforáiltear i gCinneadh 445/2014/AE maidir leis an tsolúbthacht is gá chun a leithéid d'ímthosca urghnácha a chur san áireamh.

Chun go n-áireofar go mbainfear amach cuspóirí ghníomhaíocht PCE faoi na himthosca sin, bheadh gá le Cinneadh Uimh. 445/2014/AE a athrú. Ní cheart go n-imeofaí na hathruithe sin ó bhunphrionsabail, rialacha agus nósanna imeachta an Chinnidh ach ba cheart iad a bheith srianta don mhéid a bhfuil fíorghá leis chun aghaidh a thabhairt ar an staid seo nach bhfacthas a leithéid ríomh.

Is léir gurb iad na príomhchathracha cultúir is mó a bhfuil tionchar orthu na cinn atá in ainm a mbliain chultúir a chur ar siúl faoi láthair (an dá PCE 2020) nó na cinn atá in ainm dlús a chur lena n-obair ullmhúcháin chun bheith réidh in am don bhliain seo chugainn (na trí PCE 2021). Tá tionchar i bhfad níos lú ar an dá PCE 2022 agus ar an aon PCE 2023 amháin ós rud é go

¹ Cinneadh 445/2014/AE ó Pharlaimint na hEorpa agus ón gComhairle an 16 Aibreán 2014 lena mbunaítear gníomhaíocht Aontais do Phríomhchathracha Cultúir na hEorpa do na blianta 2020 go 2033 agus lena n-aisghairtear Cinneadh Uimh. 1622/2006/CE (IO L 132, 3.5.2014, lch. 1).

² Cinneadh (AE) 2017/1545 ó Pharlaimint na hEorpa agus ón gComhairle an 13 Meán Fómhair 2017 lena leasaítear Cinneadh Uimh. 445/2014/AE lena mbunaítear gníomhaíocht Aontais do Phríomhchathracha na hEorpa do na blianta 2020 go 2033 (IO L 237, 15.9.2017, lch. 1).

bhfuil go leor ama fós acu chun dianmhachnamh a dhéanamh ar an dóigh ar féidir leo a gclár a choigeartú chun na srianta éagsúla a chur san áireamh amach anseo.

Bhí ar an dá PCE 2020 na himeachtaí uile a chur ar ceal nó ar athló ó mhí an Mhárta 2020 ar aghaidh gan aon soiléireacht acu maidir le cathain a fhillfear ar an ngnáthshaol. I bhfírinne, tá cosc orthu a mbliain mar Phríomhchathracha Cultúir a chur chun feidhme agus leas a bhaint as a ndea-obair ullmhúcháin. Dá gcuirfí síneadh le cláir chultúir PCE 2020 sa tslí go leanfaidh siad ar aghaidh in 2021 - cé nach gcúiteodh sé an dá chathair as an gcaillteanas ollmhór atá orthu - d'fhéadfadh sé léiriú nua athbhrandáilte a thabhairt ar imeachtaí an dá PCE 2020 i dtús na bliana 2021. Rachadh sé chun tairbhe dóibh freisin dá mbeadh brandáil PCE dírithe orthu ar feadh tréimhse níos faide.

Ina theannta sin, de dheasca phaindéim COVID-19, tá méid mór éiginnteachta ag baint le beagnach gach réimse a bhaineann le bliain PCE 2021 ó thaobh peirspictíochtaí airgeadais éiginnte i ndáil le comhpháirtithe poiblí agus príobháideacha, rialacháin sábháilteachta anaithnide a bhfuil tionchar acu ar obair rannpháirteach le saoránaigh agus ar na cineál imeachtaí ar féidir iad a údarú, chomh maith le srianta ar thaisteal a chiallaíonn gur lú an méid turasóireachta agus gur lú na féidearthachtaí atá ann chun comhpháirtíochtaí Eorpacha nó idirnáisiúnta a dhéanamh. De thoradh na mbearta coisctheacha, cuireadh moill chriticiúil ar obair ullmhúcháin na dtrí PCE 2021 nuair ba cheart dóibh iarrachtaí níos tréine a dhéanamh dá mbeadh imthosca normálta ann. Bhí na meithleacha cur chun feidhme faoi dhianghlasáil ar feadh roinnt míonna agus tá éiginnteacht ag bhaint le marthanas na bpáirtithe conarthacha ionchasacha. Dá bhrí sin, moltar na trí PCE 2021 a chur ar athló go 2022 nó 2023.

Tar éis don Ríocht Aontaithe tarraingt siar as an Aontas, níl ach aon chathair amháin beartaithe chun teideal PCE a bheith acu in 2023. Bheadh sé níos cothroime dhá chathair de na dtrí PCE 2021 a chur ar athló go 2023: bheadh trí PCE ann in 2022 agus trí PCE ann in 2023. Lena leithéid de chur chuige cothrom, bhainfí an leas is mó as infheictheacht ghníomhaíocht PCE.

Chun foráil a dhéanamh maidir leis na himthosca thuasluaite, is é sin an deis a thabhairt don dá PCE 2020 síneadh a chur lena gcláir chultúir sa tslí go leanfaidh siad ar aghaidh in 2021 agus teideal PCE a chur ar athló i gcás thíortha PCE 2021, tá gá le Cinneadh Uimh. 445/2014/AE a leasú.

2. BUNÚS DLÍ, COIMHDEACHT AGUS COMHRÉIREACHT

• Bunús dlí

Leis an togra seo, leasaítear Cinneadh Uimh. 445/2014/AE lena mbunaítear gníomhaíocht Aontais do Phríomhchathracha Cultúir na hEorpa do na blianta 2020 go 2033 agus tá sé bunaithe, dá bhrí sin, ar an mbunús dlí céanna, Airteagal 167(5) CFAE.

• Coimhdeacht (maidir le hinniúlacht neamheisiach)

Ós rud é gur gníomh dlí de chuid an Aontais Eorpaigh Cinneadh Uimh. 445/2014/AE, is le gníomh dlí atá coibhéiseach leis, agus leis sin amháin, is féidir é a leasú. Ní féidir le Ballstáit gníomhú ina n-aonar.

• Comhréireacht

Tá na leasuithe atá beartaithe oiriúnach chun aghaidh a thabhairt ar an staid urghnách a cruthaíodh in PCE 2020 agus 2021 trí imthosca níos fearr a chruthú dóibh inar féidir leo a

gcláir agus a n-imeachtaí cultúir a chur ar siúl ar bhealach a áiritheoidh go mbainfear cuspóirí na gníomhaíochta amach.

Ní rachaidh na leasuithe atá beartaithe thar a bhfuil riachtanach chun an cuspóir thuasluaite a ghnóthú toisc go bhfuil siad srianta d'athruithe a bhaineann leis na blianta 2020 agus 2021, an tréimhse ina bhfuil coinne leis go mbeidh an tionchar is mó ag an bpaindéim.

- **An rogha ionstraime**

Is gníomh dlí de chuid an Aontais é Cinneadh Uimh. 445/2014/AE ó Pharlaimint na hEorpa agus ón gComhairle agus is le gníomh dlí den chineál céanna, agus leis sin amháin, is féidir é a leasú.

3. TORTHAÍ NA gCOMHAIRLIÚCHÁN LE PÁIRTITHE LEASMHARA

Ó tharla ráig phaindéim COVID-19, tá an Coimisiún i ndlúth-theagmháil agus i ndlúth-idirphlé le meithleacha cur chun feidhme PCE uile ó 2020 go 2023 i gcruinnithe aonair, déthaobhacha agus iltaobhacha d'fhonn tuiscint níos fearr a fháil ar thionchar na paindéime ar chur chun feidhme agus ullmhúcháin Phríomhchathracha Cultúir na hEorpa idir na cinn reatha agus na cinn a bheidh ann amach anseo. Bhí na meithleacha cur chun feidhme i dteagmháil freisin lena mBord faoi seach chomh maith lena n-údaráis áitiúla, réigiúnacha agus náisiúnta ionas go bhféachfaidh siad le chéile ar na láithreáin is fearr chun na pleananna a chur ar aghaidh. Chuaigh roinnt údaráis náisiúnta i dteagmháil díreach leis an gCoimisiún (Éire, an Rómáin, an Ghréig, an Liotuáin, Lucsamburg, an Ungáir agus an tSeirbia).

Go háirithe, eagraíodh ceithre chruinniú ar líne le linn na tréimhse sin: an 2 Aibreán, tharla teileachomhdháil chomhpháirteach le lucht an dá PCE 2020 agus le hionadaithe ó Aireachtaí Cultúir na hÉireann agus na Cróite; an 29 Aibreán, tharla cruinniú comhpháirteach ar líne le lucht an dá PCE 2022; an 30 Aibreán, tharla cruinniú comhpháirteach ar líne le lucht na dt trí PCE 2021; agus an 5 Aibreán, tharla cruinniú comhpháirteach ar líne le lucht na n-ocht PCE le haghaidh 2020-2023.

Ar iarratas ón gCoimisiún, sheol gach cathair de PCE 2020, 2021, 2022 agus 2023 litir chuig an gCoimisiún (an chuid is mó díobh arna gcomhshíniú ag a nAireacht Cultúir nó ag a nAire Cultúir faoi seach) chun a léiriú cibé ar mhian leo clár cultúir a mbliana teidil a shíneadh nó a chur ar athló agus bonn cirt an chinnidh sin a thabhairt le fios.

Sna míreanna seo a leanas, tugtar forléargas ar thoradh an phróisis comhairliúcháin sin.

Is iad an dá PCE 2020 is mó atá faoi thionchar díreach tromchúiseach. Bhí ar an dá chathair na himeachtaí uile a chur ar ceal nó ar athló ó mhí an Mhárta 2020 ar aghaidh gan aon soiléireacht acu maidir le cathain a fhillfear ar an ngnáthshaol nó cibé acu an fhillfear ar an ngnáthshaol nó nach bhfillfear. I bhfírinne, tá cosc orthu a mbliain mar Phríomhchathracha Cultúir a chur chun feidhme agus leas a bhaint as an infheistíocht ollmhór atá déanta acu. Bhí ar an dá mheitheal PCE baill foirne a leagan as agus tá siad anois i staid neamhghníomhaíochta nach mór.

Sna trí PCE 2021, tá méid mór éiginnteachta ann i mbeagnach gach réimse a bhaineann lena n-ullmhúchán de dheasca na paindéime: peirspictíochtaí airgeadais éiginnte i ndáil le comhpháirtithe poiblí agus príobháideacha, rialacháin sábháilteachta anaithnide a bhfuil tionchar acu ar obair rannpháirteach le saoránaigh agus ar na cineál imeachtaí ar féidir iad a údarú, chomh maith le srianta ar thaisteal a chiallaíonn gur lú an méid turasóireachta agus gur

lú na féidearthachtaí atá ann chun comhpháirtíochtaí Eorpacha nó idirnáisiúnta a dhéanamh. De thoradh na mbeart coisctheach, cuireadh moill chriticiúil ar obair ullmhúcháin na dtrí PCE 2021 nuair ba cheart dóibh iarrachtaí níos tréine a dhéanamh dá mbeadh imthosca normálta ann, toisc na meithleacha cur chun feidhme a bheith faoi dhianghlasáil agus marthanas eacnamaíoch na bpáirtithe conarthacha ionchasacha a bheith éiginnte san am céanna.

Tá tionchar i bhfad níos lú ar an dá PCE 2022 agus ar an aon PCE 2023 amháin ós rud é go bhfuil go leor ama fós acu chun dianmhachnamh a dhéanamh ar an dóigh ar féidir leo a gcláir a choigeartú chun na srianta éagsúla a chur san áireamh amach anseo.

Mar chonclúid, ní hionann an tionchar atá ar na príomhchathracha cultúir do na blianta 2020 go 2023.

Is léir gurb iad na príomhchathracha cultúir is mó a bhfuil tionchar orthu na cinn atá in ainm a mbliain chultúir a chur ar siúl faoi láthair (an dá PCE 2020) nó na cinn atá in ainm dlús a chur lena n-obair ullmhúcháin chun bheith réidh in am don bhliain seo chugainn (na trí PCE 2021).

Is fiú a thabhairt faoi deara go bhféadfadh tionchar ag leibhéil éagsúla a bheith ar na príomhchathracha cultúir in aon bhliain amháin toisc nárbh ionann na bearta gaibhniúcháin ar fud na hEorpa agus toisc nach ionann athléimneacht earnáil chultúir agus acmhainneacht airgeadais a n-údarás áitiúil, réigiúnach agus náisiúnta agus/nó toisc nach raibh an leibhéal céanna forbartha bainte amach acu ó thaobh na n-ullmhúcháin de nuair a bhuaill an phaindéim iad, rud a d'fhág cuid acu i sáinn i dtráth a bhí orthu gníomhú go tapa.

4. IMPLEACHTAÍ BUISÉADACHA

Níl aon impleacht bhuiséadach dhíreach ag an togra ón gCoimisiún. Faoi na coinníollacha a shonraítear in Airteagal 14 den Chinneadh, íoctar an gradam airgid, Gradam Melina Mercouri, do gach cathair ainmnithe faoi dheireadh Mhárta na mbliana teidil agus is le hacmhainní chlár Eoraip na Cruthaitheachta atá ann laistigh de chreat airgeadais 2014-2020 a chumhdaítear na costais a bhaineann le hobair na mball sin den phainéal saineolaithe arna n-ainmniú ag institiúidí agus comhlachtaí de chuid an Aontais, nó cumhdófar na costais sin faoi chlár an Aontais lena dtacófar leis an gcultúr sna blianta i ndiaidh 2020. Ina theannta sin, ní chuirfear le líon Phríomhchathracha Cultúir na hEorpa sa tréimhse ó 2020 go 2033 mar thoradh ar an togra seo.

5. EILIMINTÍ EILE

Is é atá an Coimisiún á mholadh sa togra uaidh:

- níos mó ná dhá Bhallstát a cheadú le haghaidh na bliana 2023 san fhéilire a leagtar amach san Iarscríbhinn;
- an deis a thabhairt do PCE a d'ainmnigh an Chróit agus Éire le haghaidh 2020 a gcláir a chur chun feidhme suas go dtí an 30 Aibreán 2021 gan bliain an ainmniúcháin a athrú;
- an bhliain ina bhfuil an Rómáin agus an Ghréig i dteideal teideal PCE a óstáil a chur ar athló ó 2021 go 2023;
- an bhliain ina bhfuil tír is iarrthóir nó is iarrthóir ionchasach i dteideal teideal PCE a óstáil a chur ar athló ó 2021 go 2022;

- deimhniú a dhéanamh ar bhailíocht na bpróiseas dá dtagraítear in Airteagail 7 go 11 agus in Airteagal 13 de Chinneadh Uimh. 445/2014/AE arna dtabhairt i gcrích cheana do bhliain an teidil 2021 (gan ach bliain an teidil a bheith athraithe mar a léirítear thuas);
- dátaí seolta na meastóireachtaí deiridh a nuashonrú de réir mar is gá le haghaidh an dá PCE 2020.

Togra le haghaidh

CINNEADH Ó PHARLAIMINT NA hEORPA AGUS ÓN gCOMHAIRLE

Lena leasaítear Cinneadh Uimh. 445/2014/AE lena mbunaítear gníomhaíocht Aontais do Phríomhchathracha Cultúir na hEorpa do na blianta 2020 go 2033

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 167(5) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste na Réigiún³,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

- (1) Is iad is cuspóirí do ghníomhaíocht Phríomhchathracha Cultúir na hEorpa, de réir Airteagal 2 de Chinneadh Uimh. 445/2014/AE, éagsúlacht cultúr san Eoraip a choimirciú agus a chur chun cinn, an cultúr a spreagadh go dtacódh sé le forbairt fhadtéarmach na gcathracha, an tairiscint chultúrtha sna cathracha a fheabhsú ó thaobh réimse, éagsúlachta agus gné Eorpaí de, lena n-áirítear trí chomhar idirnáisiúnta, rochtain ar chultúr agus rannpháirtíocht ann a leathnú, acmhainneacht na hearnála cultúrtha agus a naisc le hearnálacha eile a neartú, próifíl idirnáisiúnta na gcathracha a ardú trí chultúr.
- (2) Chun na cuspóirí sin a bhaint amach, glactar leis go mbeidh soghluaisteacht, taisteal, eagrúchán imeachtaí agus rannpháirtíocht an phobail ann, rudaí atá an-deacair a dhéanamh nó beagnach dodhéanta fiú in aimsir phaindéim COVID-19.
- (3) Mar thoradh díreach ar na bearta dianghlasála a cuireadh i bhfeidhm ar fud na hEorpa, dúnadh ionaid chultúrtha agus cuireadh imeachtaí cultúrtha ar ceal nó ar athló ar feadh tréimhse neamhchinntithe. Tá moill ollmhór ar thionscadail chomhair chultúrtha Eorpacha nó idirnáisiúnta ós rud é go bhfuil srianadh mór ar thrasnú fisiciúil na dteorannacha. Ar deireadh, mar gheall ar ioncaim a bheith ag ísliú go tapa agus riachtanais sláinte poiblí ag teacht chun cinn, tá tuilleadh brú ó thaobh buiséid de ar rialtais áitiúla, réigiúnacha agus náisiúnta. Tá sé níos deacra urraíocht phríobháideach a fháil don chultúr faoi láthair toisc nach bhfuil aon imeacht poiblí ann chun urraíocht a thabhairt dó nó toisc go bhfuil gnólachtaí ag tabhairt tús áite d'imeachtaí a bhaineann leis an tsláinte phoiblí nuair atá siad ag cur urraíochta ar fáil.
- (4) Tá tionchar ar leibhéil éagsúla ar Phríomhchathracha Cultúir na hEorpa idir na cinn reatha agus na cinn a bheidh ann amach anseo, ag brath ar an mbliain dá bhfuil an

³ IO C , , lch. .

teideal acu. De réir cosúlachta, is ar chur chun feidhme an dá Phríomhchathair Chultúir le haghaidh 2020 agus ar ullmhúchán na dtrí Phríomhchathair Chultúir le haghaidh 2021 atá an tionchar is láidre.

- (5) Bhí ar an dá Phríomhchathair Chultúir le haghaidh 2020 na himeachtaí uile a chur ar ceal nó ar athló ó mhí an Mhárta 2020 ar aghaidh gan aon soiléireacht acu maidir le cathain a fhillfear ar an ngnáthshaol nó cibé acu an fhillfear ar an ngnáthshaol nó nach bhfillfear. I bhfírinne, tá cosc orthu a mbliain mar Phríomhchathracha Cultúir na hEorpa a chur chun feidhme agus leas a bhaint as an infheistíocht ollmhór atá déanta acu.
- (6) De dheasca na paindéime, tá méid mór éiginnteachta ann sna trí PCE 2021 i mbeagnach gach réimse a bhaineann lena n-ullmhúchán: peirspictíochtaí airgeadais éiginnte i ndáil le comhpháirtithe poiblí agus príobháideacha, rialacháin sábháilteachta anaithnide a bhfuil tionchar acu ar obair rannpháirteach le saoránaigh agus ar na cineál imeachtaí ar féidir iad a údarú, chomh maith le srianta ar thaisteal a chiallaíonn gur lú an méid turasóireachta agus gur lú na féidearthachtaí atá ann chun comhpháirtíochtaí Eorpacha a dhéanamh. De thoradh na mbeart coisctheach, cuireadh moill chriticiúil ar obair ullmhúcháin na dtrí PCE 2021 nuair ba cheart dóibh iarrachtaí níos tréine a dhéanamh dá mbeadh imthosca normálta ann, toisc na meithleacha cur chun feidhme a bheith faoi dhianghlasáil agus marthanas eacnamaíoch na bpáirtithe conarthacha ionchasacha a bheith éiginnte san am céanna.
- (7) Ní fhoráiltear i gCinneadh Uimh. 445/2014/AE maidir leis an tsolúbthacht is gá chun na himthosca urghnácha seo a chur san áireamh, go sonrach, níl aon fhoráil ann maidir leis an mbliain ina bhfuil teideal Phríomhchathair Chultúir na hEorpa ag cathair áirithe a shíneadh nó a chur ar athló.
- (8) Dá bhrí sin, ba cheart Cinneadh Uimh. 445/2014/AE a leasú ar bhealach atá in oiriúint go daingean don riachtanas maidir le haghaidh a thabhairt ar an staid eisceachtúil seo chun go mbeidh na cathracha a bhfuil teideal Phríomhchathair Chultúir na hEorpa acu agus is mó atá faoi thionchar na paindéime in ann a gcláir a chur chun feidhme ar bhealach lena mbainfear amach cuspóirí na gníomhaíochta.
- (9) Tar éis próiseas comhairliúcháin a raibh na cathracha agus na Ballstáit lena mbaineann páirteach ann, cinntear gur iomchuí an deis a chur ar fáil do chathracha PCE a d'ainmnigh an Chróit agus Éire le haghaidh 2020 leanúint de bheith ag cur a gcláir chun feidhme suas go dtí an 30 Aibreán 2021 gan bliain an ainmniúcháin a athrú. Dá bhrí sin, ba cheart Airteagail 3, 4 agus 16 de Chinneadh 445/2014/AE a leasú dá réir mar is gá.
- (10) Tar éis próiseas comhairliúcháin a raibh na cathracha agus na Ballstáit lena mbaineann páirteach ann, cinntear gur cheart an bhliain ina bhfuil an Rómáin agus an Ghréig i dteideal teideal Phríomhchathair Chultúir na hEorpa a óstáil a chur ar athló ó 2021 go 2023 agus gur cheart an bhliain ina bhfuil tír is iarrthóir nó is iarrthóir ionchasach i dteideal teideal PCE a óstáil a chur ar athló ó 2021 go 2022. Dá bhrí sin, ba cheart Airteagal 3 de Chinneadh 445/2014/AE agus an féilire a leagtar amach san Iarscríbhinn a ghabhann leis an gCinneadh sin a leasú de réir mar is gá. Ní cheart go mbeadh tionchar ag an gCinneadh seo ar bhailíocht na nósanna imeachta dá dtagraítear in Airteagail 7 go 11 agus 13 arna dtabhairt i gcrích cheana maidir le bliain an teidil 2021,

TAR ÉIS AN CINNEADH SEO A GHLACADH:

Airteagal 1

Leasaítear Cinneadh Uimh. 445/2014/AE mar a leanas:

(1) Leasaítear Airteagal 3 mar a leanas:

(a) cuirtear an méid seo a leanas in ionad an dara fomhír de mhír 2:

‘Bronnfar an teideal gach bliain ar aon chathair amháin, ar a mhéad, as gach ceann den dá Bhallstát atá luaite san fhéilire a leagtar amach san Iarscríbhinn ("an féilire") agus, sna blianta ábhartha, ar aon chathair amháin as tír i gComhlachas Saorthrádála na hEorpa atá ina pháirtí sa Chomhaontú ar an Limistéar Eorpach Eacnamaíoch ("tír CSTE/LEE"), ar aon chathair amháin as tír is iarrthóir nó is iarrthóir ionchasach, nó ar aon chathair amháin as tír a bheidh tar éis aontú don Aontas sna dálaí a leagtar amach i mír 5. In 2023, bronnfar an teideal ar aon chathair amháin, ar a mhéad, i ngach ceann de na trí Bhallstát atá luaite san fhéilire a leagtar amach san Iarscríbhinn.’;

(b) cuirtear an méid seo a leanas in ionad mhír 3:

‘Beidh cathracha sna Ballstáit i dteideal an teideal a bheith acu ar feadh bliana i gcomhréir le hord na mBallstát atá luaite san fhéilire. Beidh deis ag na cathracha a bhfuil an teideal acu in 2020 leanúint de bheith ag cur a gcláir cultúir chun feidhme suas go dtí an 30 Aibreán 2021, gan bliain an ainmniúcháin a bheith athraithe.’

(2) Cuirtear an méid seo a leanas in ionad an dara fomhír d'Airteagal 4(2):

‘Cuimseoidh an clár cultúir bliain an teidil agus cruthófar é go sonrach le haghaidh an teidil, i gcomhréir leis na critéir a leagtar síos in Airteagal 5. Beidh deis ag na cathracha a bhfuil an teideal acu in 2020 leanúint de bheith ag cur a gcláir cultúir chun feidhme suas go dtí an 30 Aibreán 2021.’

(3) Cuirtear an cúigiú fomhír seo a leanas le hAirteagal 16(1):

‘Déanfaidh na cathracha a bhfuil an teideal acu in 2020 a gcuid tuarascálacha meastóireachta a tharraingt suas agus a tharchur chuig an gCoimisiúin faoin 30 Aibreán 2022.’

(4) Cuirtear an téacs a leagtar amach san Iarscríbhinn a ghabhann leis an gCinneadh seo in ionad na hIarscríbhinne.

Airteagal 2

Na nósanna imeachta dá dtagraítear in Airteagail 7 go 11 agus in Airteagal 13(2)(a) de Chinneadh 445/2014/AE arna dtabhairt i gcrích cheana do bhliain an teidil 2021, leanfaidh siad de bheith bailí. Athrófar bliain an teidil i gcomhréir leis an Iarscríbhinn a ghabhann leis an gCinneadh seo.

Airteagal 3

Tiocfaidh an Cinneadh seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Arna dhéanamh sa Bhruiséil,

Thar ceann Pharlaimint na hEorpa
An tUachtarán

Thar ceann na Comhairle
An tUachtarán